



Le peuple d'Israël ayant offensé Dieu, est puny par la morsure des serpens ardens, & depuis guarý.

LE peuple Israélite continuant son voyage, vint de la montagne de Hor par la voye qui meine à la mer Rouge, pour circuir la terre d'Edom, & se fascha du labeur du chemin, & parloit contre le Seigneur, & Moysé luy disant : Pourquoy nous as-tu tirez d'Egypte pour mourir au desert, où n'y a pain ny eau : nostre ame a vn degoust de ce pain tant leger. Parquoy le Seigneur enuoya sur le peuple murmurans des serpens pleins de feu : pour la blessure desquels, & la mort de plusieurs, le peuple vint à Moysé, disant ; Nous auons peché, parce que nous auons parlé contre le Seigneur, & contre toy : Prie-le qu'il fasse retirer de nous les serpens Et Moysé pria pour le peuple. Et le Seigneur luy dist, Fais vn serpent d'airain ; & le mets pour signe ; quiconque sera mors & le verra, il viura. Moysé donc fit esleuer vn serpent d'airain, & le mit pour signe. Et quand ceux qui estoient frappez des serpens le regardoient, ils estoient guaris. Et les Israélites partirent, & posèrent leur camp en Oboth : de là passant outre, trauerferent plusieurs deserts, & prièrent le Roy des Amorrhéens de passer seulement par le chemin public, ce qu'il ne voulut accorder. Enfin ayant esté vaincu par les Israélites, ils occuperent les villes & villages, comme ils firent aussi celles d'Og, Roy de Basan.